

A Mesa do Parlamento, na súa sesión do día 24 de abril de 2025, adoptou os seguintes acordos:

## **PUNTO 2.º- COMPOSICIÓN DO PARLAMENTO, RÉXIME E GOBERNO INTERIOR, ORGANIZACIÓN E FUNCIONAMENTO**

### **2. Administración do Parlamento de Galicia**

#### **2.1. Convenios e acordos**

#### **Convenio de colaboración entre o Parlamento de Galicia e a Escola Galega de Administración Pública, para o desenvolvemento de actividades de formación, divulgación e investigación**

O Xefe de servizo de Persoal e Réxime Interior formula unha proposta de convenio de colaboración coa EGAP, en termos semellantes aos reflectidos en convenios anteriores.

A formación continua do persoal ao servizo do Parlamento de Galicia é unha prioridade estratéxica para garantir unha administración moderna, eficaz e adaptada aos retos actuais. O *Estatuto de Persoal do Parlamento de Galicia* establece no seu artigo 42º a obriga de promover actividades formativas como parte do desenvolvemento profesional e da mellora da calidade dos servizos parlamentarios. Non obstante, a capacidade interna do Parlamento para desenvolver estas actividades formativas é limitada debido á falta de infraestruturas específicas, recursos humanos especializados e experiencia consolidada neste ámbito.

Neste contexto, a Escola Galega de Administración Pública (EGAP) preséntase como o organismo idóneo para cubrir esta necesidade, ofrecendo unha ampla oferta formativa adaptada ás demandas do persoal parlamentario e ás esixencias dunha administración pública moderna.

Os obxectivos principais desta proposta son os seguintes:

1. Cumprir co mandato establecido no artigo 42º do Estatuto de Persoal, promovendo actividades formativas que melloren as competencias profesionais do persoal. Este mandato responde á necesidade de dotar aos empregados públicos dunha formación continua que lles permita adaptarse ás novas esixencias da xestión pública.
2. Dotar ao persoal parlamentario das ferramentas necesarias para afrontar os retos derivados da transformación dixital, os cambios normativos e as novas demandas cidadás.
3. Optimizar recursos mediante a colaboración coa EGAP, aproveitando a súa experiencia, infraestrutura e recoñecida capacidade organizativa.
4. Garantir un nivel formativo acorde coa importancia institucional do Parlamento, fortalecendo así a súa función como órgano lexislativo clave na Comunidade Autónoma de Galicia.

A EGAP conta cunha ampla experiencia na formación dos empregados públicos galegos, ofrecendo cursos específicos en áreas clave como:



Transformación dixital e administración electrónica.  
Dereito administrativo e normativa autonómica.  
Igualdade de xénero nas políticas públicas.  
Xestión orzamentaria e económica.  
Comunicación institucional e habilidades transversais.

Ademais, a EGAP dispón das infraestruturas necesarias (aulas presenciais, plataformas de teleformación) e dun equipo docente altamente cualificado, o que garante unha formación eficaz e adaptada ás necesidades reais do persoal parlamentario.

Asemade o convenio contempla outras colaboracións posibles como son: a edición conxunta de libros, outras publicacións e documentos de traballo, a promoción da actividade investigadora entre ambas, ademais doutras actuacións de interese común nesa liña.

Por outra parte, na cláusula terceira se recolle o procedemento de homologación pola EGAP das actividades formativas executadas polo parlamento, tendo en conta a singularidade da actividade lexislativa así como a especialidade administrativa.

Doutra parte, dada En atención á natureza dos compromisos adquiridos polos asinantes non cabe cualificalo como contrato administrativo, considerándose excluído do ámbito da Lei 9/2017, de 8 de novembro, de Contratos do Sector Público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, virtude do art. 6 do mesmo.

Conforme o establecido na disposición adicional vixésimo segunda da Lei 40/2015, do 1 de outubro, de réxime xurídico do sector público, a actuación administrativa dos órganos competentes de, entre outros, as Asembleas Lexislativas das Comunidades Autónomas, rexerase polo previsto na súa normativa específica, no marco dos principios que inspiran a actuación administrativa de acordo con esta lei; deberá, polo tanto respectar os principios xerais dos artigos 3 e 4 da Lei 40/2015, e os convenios, no marco do respecto á súa autonomía organizativa, adecuarse ao capítulo VI da citada lei.

As actuacións previstas no Convenio non implican, por parte do Parlamento de Galicia, compromiso de gasto para os anos de vixencia deste convenio, que se estendería dende a data da súa sinatura ata o 31 de decembro de 2028.

En conclusión, a colaboración entre o Parlamento de Galicia e a Escola Galega de Administración Pública constitúe unha solución viable, eficiente e plenamente xustificada. para garantir o cumprimento das obrigas formativas establecidas no Estatuto de Persoal. A dificultade actual do Parlamento para organizar internamente actividades formativas fai imprescindible recorrer á experiencia contrastada da EGAP, garantindo así unha formación continua que permita ao persoal afrontar os retos dunha administración pública moderna.



Por todo isto, considérase plenamente xustificada esta proposta, que redundará nunha mellora significativa na calidade dos servizos prestados pola Administración parlamentaria.

O texto do convenio de que se trata é que deseguido se transcribe:

### REUNIDOS

Dunha parte, **D. Miguel Ángel Santalices Vieira**, na súa condición de presidente do Parlamento de Galicia, actuando en nome e representación deste, e no exercicio das funcións que lle confiren o Estatuto de Autonomía de Galicia, as demais leis e o Regulamento do Parlamento de Galicia;

doutra, **Dña. Sonia Rodríguez-Campos González**, Directora da Escola Galega de Administración Pública (en adiante EGAP), nomeada polo Decreto 146/2012, do 12 de xullo (DOG nº 134 do 13 de xullo), actuando en nome e representación da EGAP, en virtude das facultades que lle confire o artigo 9 da Lei 4/1987, do 27 de maio, de creación da EGAP;

Teñen a capacidade legal necesaria para formalizar o seguinte Convenio de Colaboración e

### EXPOÑEN

**PRIMEIRO.-** Que o Parlamento de Galicia, tal e como se desprende do artigo 12 do Estatuto de Galicia, ten autonomía para establecer a organización administrativa ao seu servizo, que lle posibilita o desenvolvemento eficaz e eficiente das funcións que estatutariamente lle corresponden, o que constitúe unha manifestación máis da súa posición singular, en canto poder público do sistema político galego, recolléndose no artigo 60 do seu Regulamento os mecanismos para que esta autonomía organizativa e funcional sexa efectiva.

**SEGUNDO.-** Que o Parlamento de Galicia está a desenvolver un Plan de Formación Integral e Permanente do seu persoal destinado a elevar e facilitar a súa capacitación e promoción profesional, o cal contribuirá a unha maior eficacia e modernización da Administración Parlamentaria.

**TERCEIRO.-** Que a EGAP é un organismo autónomo de carácter administrativo e unha entidade de dereito público con personalidade xurídica propia, que actúa con plena autonomía funcional para o cumprimento dos seus fins.

**CUARTO.-** Que a Lei 4/1987, do 27 de maio, pola que se crea a EGAP, menciona entre os fins da Escola a formación, o perfeccionamento, a investigación, a documentación, o estudo e a realización de traballos de divulgación no campo da administración pública, promovendo á súa máxima difusión.

**QUINTO.-** A Resolución da Dirección da Escola Galega de Administración Pública, do 10 de maio de 2023 (DOG núm. 96, do 23 de maio), pola que se fan públicas as bases e as condicións xerais de participación nas actividades formativas establece na base primeira, puntos 2 e 3 que, tendo en conta os convenios que se subscriban para este efecto, poderá participar nas



actividades que convoque a EGAP o persoal que preste servizo nas entidades locais da Comunidade Autónoma de Galicia, o persoal ao servizo das universidades do Sistema universitario de Galicia, o persoal ao servizo da Administración institucional da Comunidade Autónoma de Galicia, o persoal ao servizo doutras entidades, organismos e empresas públicas, así como as persoas pertencentes a outros colectivos de interese para a Administración, cando así se estableza nas respectivas convocatorias.

**SEXTO.-** Que ambas as dúas partes consideran de mutuo interese para o cumprimento das súas respectivas funcións establecer fórmulas de colaboración no ámbito formativo, divulgador e investigador a través deste convenio.

En virtude do exposto, ambas as dúas partes, recoñecéndose capacidade suficiente na representación que ostentan, acordan asinar un convenio de colaboración de acordo coas seguintes

## CLÁUSULAS

### PRIMEIRA.- Obxecto

O obxecto deste convenio entre o Parlamento de Galicia e a EGAP é a colaboración e o desenvolvemento conxunto de actividades de carácter formativo, divulgador e investigador en materias da competencia das institucións asinantes do mesmo; actuando de forma máis eficaz e eficiente na utilización dos medios humanos, materiais e organizativos de cada unha delas, para un mellor cumprimento dos fins de ambas as dúas partes, en beneficio da cidadanía e da sociedade galega.

### SEGUNDA.- Actuacións

As modalidades de colaboración consistirán en:

- A participación nas actividades da EGAP do persoal dependente do Parlamento de Galicia, que fará a selección do referido persoal para cada actividade concreta de conformidade co disposto na Resolución da Escola Galega de Administración Pública do 10 de maio de 2023 (DOG núm. 96, do 23 de maio), corrección de erros (DOG núm. 130, do 10 de xullo, e DOG núm. 148, do 4 de agosto de 2023), selección que comunicará a EGAP.
- A realización conxunta de cursos, xornadas, seminarios e outras actividades de divulgación.
- A edición conxunta de libros, outras publicacións e documentos de traballo. Ambas as dúas partes comprométese a remitir un exemplar das súas publicacións periódicas á Biblioteca da outra para a súa difusión.
- A promoción da actividade investigadora de ambas as dúas partes mediante proxectos de investigación conxuntos.
- Cantas outras sexan consideradas de interese común, dentro da competencia e dispoñibilidade das partes, en relación coa actividade obxecto deste convenio.



### TERCEIRA.- Procedemento de definición da acción formativa

1. En aplicación do previsto na Resolución do 19 de novembro de 2008 pola que se establecen o procedemento e os requisitos de homologación de accións formativas por parte da Escola Galega de Administración Pública (DOG núm. 235, do 3 de decembro), as entidades promotoras de accións formativas deberán remitir ao Servizo de programación das actividades de formación da EGAP con dous meses de anticipación ao inicio da acción formativa unha memoria explicativa na que se faga referencia aos seguintes extremos:

- A. Indicación da persoa responsable da tramitación ante a EGAP.
- B. Denominación, obxectivo e metodoloxía da acción formativa. A impartición de actividades na modalidade de teleformación deberá adecuarse aos estándares fixados pola EGAP.
- C. Programa e número de horas lectivas.
- D. Lugar, data e horario de realización.
- E. Sistema de avaliación do alumnado.
- F. Criterios de selección, que terán que axustarse a criterios obxectivos tendo en conta a relación do contido da acción coas tarefas do posto desempeñado. Subsidiariamente empregaranse os da Resolución do 10 de maio de 2023 (DOG núm. 96, do 23 de maio)
- G. Destinatarios, número de asistentes. Debe ser preferentemente persoal ao servizo das administracións públicas de Galicia.
- H. Perfil do profesorado que impartirá as clases e, se están determinados, unha relación dos docentes cos seus currículos e con indicación da súa inscrición no Rexistro de Formadores da EGAP.

2. Unha vez recibida a memoria, a EGAP a examinará e comprobará o cumprimento dos anteditos requisitos. No caso de que se cumpran, así o comunicará á entidade promotora, quen a continuación deberá manifestarlle á EGAP o prazo de matrícula cunha antelación suficiente ao comezo da acción formativa de cara a que a EGAP poida publicar no *Diario Oficial de Galicia* e/ou na páxina web da EGAP a convocatoria da actividade formativa e os alumnos poidan matricularse, o que deberán facer na área de matrícula da EGAP <https://egap.xunta.es/matricula>

3. Así mesmo, segundo o establecido na antedita resolución, as entidades promotoras de accións formativas deberán remitir ao Servizo de programación das actividades de formación da EGAP, no momento de finalizar a actividade formativa, e no prazo máximo de dous meses, unha memoria- resumo que faga referencia aos seguintes aspectos:

- a) A relación de docentes cos seus respectivos currículos para o caso de que non estiveran determinados no momento de presentarse a memoria anterior.
- b) Relación certificada de participantes que cumpran os requisitos necesarios para ter dereito á expedición do certificado. Para os efectos de obtención do certificado de aproveitamento, relación certificada de participantes indicando a avaliación do alumnado.
- c) Copia do material didáctico empregado. No caso de actividades de teleformación, ademais facilitarase a EGAP durante o desenvolvemento do curso un acceso a elas na plataforma correspondente.
- d) Resultado global das enquisas de valoración realizadas polas persoas participantes.



e) Controis de asistencia. Para os efectos da expedición dos certificados, son de aplicación os requisitos de asistencia previstos pola EGAP.

#### **CUARTA.- Establecemento dunha Comisión Mixta de Seguimento.**

Establecerase unha Comisión Mixta integrada por representantes de cada unha das partes. Actuarán como representantes, por parte da EGAP, a persoa responsable da secretaría xeral e un xefe ou xefa de servizo que designe a persoa titular da dirección, ou persoas en quen deleguen e, por parte do Parlamento de Galicia, as persoas titulares dos órganos que designe a súa presidencia ou persoas en quen deleguen.

Serán funcións desta Comisión Mixta de Seguimento:

- 1.- Velar polo cumprimento do convenio.
- 2.- Concretar, seguir, interpretar e avaliar as accións derivadas deste convenio.
- 3.- Adoptar ou propoñer as medidas necesarias para garantir o exercicio coordinado das competencias de cada unha das partes.
- 4.- Resolver os problemas de interpretación que poidan xurdir.
- 5.- En xeral, as que o artigo 49 f) da Lei 40/2015, do 1 de outubro, de réxime xurídico do sector público, lle atribúe o órgano de vixilancia e control.
6. Concreción, seguimento, interpretación e avaliación das accións derivadas deste convenio.

#### **QUINTA.- Orzamento.**

A sinatura deste convenio non implica, por parte da EGAP, nin do Parlamento de Galicia, compromiso de gasto con cargo ás partidas orzamentarias do estado de gastos dos orzamentos xerais da Comunidade Autónoma de Galicia nin, para o Parlamento de Galicia, para os anos de vixencia deste convenio.

#### **SEXTA.- Inexistencia de relación laboral.**

A subscrición deste convenio non implicará relación laboral, contractual ou de calquera outro tipo entre os profesionais que realicen as actividades obxecto deste convenio e a EGAP.

#### **SÉTIMA.- Dereitos de uso e propiedade industrial e intelectual.**

Os dereitos de propiedade intelectual e industrial sobre a totalidade das creacións resultado deste convenio, son titularidade conxunta da EGAP e do Parlamento de Galicia.

As partes necesitan a autorización expresa da outra para proceder a edición, representación, gravación e reprodución audiovisual, informática, ou por calquera outro medio, formato o soporte, do resultado e dos materiais froito do desenvolvemento do proxecto.

#### **OITAVA.- Modificación, Denuncia e Resolución do Convenio**





As partes poderán modificar ou resolver este convenio en calquera momento por mutuo acordo. Así mesmo, poderán denunciar este convenio en calquera momento por vontade expresa de calquera das partes cun preaviso de quince días naturais.

O incumprimento de calquera das obrigas contraídas neste convenio por unha das partes facultará á outra para resolvelo, cos efectos que legalmente procedan.

#### **NOVENA.- Réxime xurídico e resolución de conflitos.**

Este convenio ten natureza administrativa e rexerase pola Lei 40/2015, do 1 de outubro, de réxime xurídico do sector público, pola Lei 39/2015, do 1 de outubro, do procedemento administrativo común das Administracións Públicas, polas demais normas de dereito administrativo e, no seu defecto, polas normas de dereito privado.

Terase en conta o establecido no artigo 15 da Lei 1/2016, do 18 de xaneiro, de transparencia e bo goberno, en especial no que se refire a publicidade deste convenio.

As discrepancias que poidan xurdir na interpretación e cumprimento deste convenio de colaboración resolveranse nos termos previstos no artigo 18 da Lei 14/2013, do 26 de decembro, de racionalización do sector público autonómico e no artigo 13 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, para os conflitos de atribucións.

#### **DÉCIMA.- Consentimento das partes en materia de protección de datos.**

As persoas asinantes deste convenio manifestan o seu consentimento para que os seus datos persoais que aparecen neste e maillo resto de especificacións nel contidas poidan ser publicados no Portal de Transparencia e Goberno Aberto.

Así mesmo as persoas asinantes deste convenio manifestan o seu consentimento para que as súas rúbricas deste consten nas copias que se remitan para a súa publicación no referido portal

#### **UNDÉCIMA.- Vixencia.**

Este convenio estenderá a súa vixencia dende a data da sinatura por todas as partes ata o 31 de decembro de 2028, podendo prorrogarse por mutuo acordo das partes antes da súa finalización, ou de cada unha das súas prórrogas, salvo denuncia de calquera das partes antes do seu termo.

Este convenio de colaboración obriga ao cumprimento do expresamente pactado, someténdose todas as partes ao acordado en todas as estipulacións, e como proba de conformidade subscríbese electronicamente.

Consta no expediente o informe favorable emitido pola letrada da cámara e a fiscalización pola interventora.

En consecuencia, a Mesa adopta o seguinte ACORDO:



1º) Autorizar a formalización do convenio, transcrito na parte expositiva, de colaboración entre a EGAP e o Parlamento de Galicia e a Escola Galega de Administración Pública, para o desenvolvemento de actividades de formación, divulgación e investigación.

2º) O convenio non prevé ningunha obriga económica, mais de concretarse as actuacións e derivar custes deberán ser obxecto do correspondente expediente cara a súa autorización previa e fiscalización.

3º) Comunicarlles este acordo ao Gabinete da Presidencia da Cámara, á Intervención e Asuntos Económicos e ao Servizo de Persoal e Réxime Interior.

Santiago de Compostela, 29 de abril de 2025

Xosé Antón Sarmiento Méndez  
Letrado oficial maior





Asinado dixitalmente por:



**PARLAMENTO DE GALICIA**  
**REXISTRO XERAL SAÍDA**  
**Data asento: 30/04/2025 11:28:34**  
**Nº Rexistro: 6753**  
Data envío: 30/04/2025 11:28:34.616

Xosé Antón Sarmiento Mendez, Letrado Oficial Maio na data 30/04/2025 10:45:22

CSV: REXPG-bt6LY9qTT-5  
Verificación:  
<https://sede.parlamentodegalicia.gal/tramites/csv/>



Asinado dixitalmente por:

REXISTRO ELECTRÓNICO na data 30/04/2025 14:53:45



**PARLAMENTO DE GALICIA**  
**REXISTRO XERAL SAÍDA**  
**Data asento: 30/04/2025 11:28:34**  
**Nº Rexistro: 6753**  
Data envío: 30/04/2025 11:28:34.616

CSV: REXPG-bt6LY9qTT-5  
Verificación:  
<https://sede.parlamentodegalicia.gal/tramites/csv/>

